

四明叢書

張宗祥

容膝軒文集卷六

鎮海王榮商友萊撰

志表

贈中議大夫傅君鯉門墓表

君姓傅氏諱昌禮字鯉門鎮海金泉里人也曾祖其發
贈奉政大夫祖逢彩父鼎基兩世並贈朝議大夫母賀
恭人君由國學生議敘布政使司理間加同知銜累贈
中議大夫元配江氏繼娶竺氏側室潘氏並贈淑人傅
氏自君之父朝議公始以服賈致富爲人慷慨明大義

粵賊之亂公首助千金迎官兵於定海諸富人皆應和賊以殄滅鄉邦賴之君少時往來甌閩江淮之間爲朝議公所倚任其後賢遷益廣君以足疾不復出優游一室中總攬大綱而已其遇人情意落落與之語目直上視若弗聞者然樸誠寬大能守朝議公家法以傳之子孫而恤其族姻故舊故吾鄉論累世忠厚者必推傅氏爲最嗟夫俗之薄久矣機械變詐以爲巧浮僞刻深以爲能操必得之術與擾擾者相角於名利之途其究也或一無所得或旣得而旋失亦或久之而未失若是者

皆命也而世人不察見夫巧且能者之偶得也則竭心力以慕效之以余所見凡世俗所謂巧且能者傅氏皆無有也然其所得亦久而不失彼巧且能者或未逮焉此可以思矣君嘗與弟昌珩修復鯤池書院德清俞樾爲記事詳縣志其他善行尙多然皆富人所易能者於君爲小節故不書君有男子五人梅仙國學生議敘理問加四級賚弼壬午舉人內閣中書家棣宣講生早卒江淑人出汝霖縣學生議敘光祿寺署正加六級潘淑人出廷贊國學生議敘都察院都事加五級女子二人

長適登仕郎孫家振次適李某皆江淑人出孫男五人
孫女十餘人君卒於光緒二年正月二十八日年五十
一以九年某月日葬清涼山之麓三淑人祔旣葬賚弼
以表墓之文請余於君爲年家子自丙寅以後歲就
君家讀書至郡城輒宿君寓舍故知君之深莫余若者
謹述君之梗概而并推論夫傳氏保世滋大之由使鐫
諸石以告後之人焉

樂秉國先生墓志銘

先生諱汝驤字秉國鎮海湖塘人也曾祖某祖某父瀛

岡皆國學生樂氏自唐以來世爲邑中著姓而先生祖父以貲雄於鄉園樹花木猶有故家餘習先生少放縱不羈旣乃痛自懲艾獨肆力於舉子業所錄房考行卷高可隱人爲文伸紙立就然久困童子試以國學生四赴鄉闈凡三薦皆不售同治丁卯主考已取中矣尋以三藝有疵復棄去戊辰始補府學生又十年爲光緒戊寅十月十日以疾卒於家年五十三孺人同里虞氏祥治之女生男子五人俊宣俊宗俊宅俊宇俊寓女子五人其四皆殤存者適舉人王榮商孫男女若干人先生

性狷急既連困於有司居常鬱鬱好使酒罵人坐是得
狂名然榮商竊有異於先生者自西人互市以來所以
疲敝中國者蓋亦多術矣惟煙之流毒尤甚中國無貴
賤智愚旣入其中鮮有能自脫者先生沈迷者數年一
夕忽大悔恨盡碎其具投廁中而絕口不復食嗚呼斯
非有志之士而能之歟諸子以某年月日葬先生於瓔
珞河上之樸查山而榮商素有知己之感爲之銘曰
赫赫中華羣陰蔽之靡靡醢酒其甘如飴不遠而復先
生非癡懦夫可立視此銘詩

中書科中書林公墓志銘

公諱瑞璜字玉洲鎮海林氏祖大富父世莫母朱氏鄔氏
公朱出也季父世超早歿無子以公兼祧公事節母賀氏
如己母節母亦自忘其無子而視公如己子及卒奉旨旌
表公爲伐石立坊於通衢大書深刻鄉人至今以爲榮相
與瞻望歎息曰節母有子矣公善治生不好燕遊遇里中
義舉則出金飲助無吝色嘗與同志倡立體元會葬枯粟
乏至今不廢其所爲多此類由國學生議敘中書科中書
贈兩父皆徵仕郎母皆孺人公卒於同治七年七月二十

九日年六十二配於孺人國學生諱萬育之女卒於咸豐九年九月三日年五十二以光緒某年某月日合葬於廬山磯之西原子男四人文鈞國學生文翰縣學廩膳生文謨文紹皆國學生孫男十五人曾孫男一人公既有四子乃以文翰文紹承季父祀文翰長子兆松光緒己卯科舉人余之友也將葬來請銘余不敢辭銘曰

岷山導江實惟一原至公而匯繼世乃蕃珊瑚玉樹異柯同根我銘懿德昭示後昆

贈資政大夫峻峰陳公墓表

光祿寺署正銜國子監生累贈資政大夫陳公諱雲岐
字峻峰慈谿人也曾祖咸九贈儒林郎祖又昌父廷綸
議敘州同知兩世皆贈奉直大夫母蔣宜人公治生以
勤制用以奮教家以嚴少賈於杭老而歸里子孫舉甲
乙科公皆親見之光緒五年九月某日考終享年八十
諸子以公留杭久山水名勝魂魄所戀當在於是十二
十二年某月某日葬公於錢塘縣明聖湖上貴人峰下
夫人宓氏葉氏祔禮也子男八人溶泉殤錦泉監生錦
藻縣學生杭府訓導皆封資政大夫錦榮舉人蕭山訓

導錦濤從九品封朝議大夫錦渭監生候選府同知錦棠廩貢生候選教諭錦沂監生女二人適俞鴻樂繡恒孫男十六人曾孫男二十人將葬錦藻之子花翎三品銜刑部郎中邦瑞請余表墓惟公福備於身慶衍於世孫曾蕃昌封誥稠疊邦瑞方以勤謹參佐樞務駸駸將大用沿流討源公之陰德軼事蓋有人所不及知者此其大略也謹表

謝櫓峰先生墓表

有篤行君子曰謝櫓峰先生諱周訓字魯封鎮海人也

曾祖某祖某父家有贈奉直大夫母樂宜人先生年十二而孤執喪禮如成人侍母疾終夜不寢疾篤取糞嘗之而甜因籲天求代母卒水漿不入口者七日日則營葬夜則廬墓既除喪遇生日忌辰必親薦在外雖大風雨必至祭畢而餽念其親嘗嗜此則哽咽不能下性嗜酒幼時母嘗戒之其後飲不過三爵雖戚友不知其善飲也與其兄良訓最友愛兄服賈於蘇家中食用皆身任之不以析爨有異兄歸輒就先生塾中歡談竟日夕一日兄弟相敘於思園有脊令翔集庭樹識者以爲雍

睦所感同治乙丑兄卒於逆旅先生方就試會城星夜奔喪逆旅主人索殮費二百餘貫先生心知其欺以兄故弗忍校罄囊償之扶柩而返踰數年先生亦卒而其兄未葬易簀時誠諸子曰汝曹必先葬兄而後葬我否則魂魄不安矣其篤於天性如此幼勸學父歿後兄將攜之習賈行有日矣先生手一編不輟兄感悟仍使就學遂博通經史善屬文門下著籍者前後數百人館穀所入悉以周族黨之貧者羣從孤嫠皆待以舉火凡爲嫁娶者六營葬者十有一又爲遠祖置墓田以供祀事

及卒家徒壁立獨以陰德遺其子孫而已生平非禮勿
履服御之物喜方而惡圓邑令以禮敦請未嘗一往與
人交懇切周至人皆敬而畏之有過則相戒曰得毋爲
櫓峰先生所聞耶喜獎掖後進子弟聰穎者輒勸之學
貧者不受其脩脯且資給之使卒業以是多所成就或
相繼掇科第以去而先生累薦不售終於廩貢生候選
訓導同治十年正月六日卒年六十娶胡氏朱氏皆有
淑行子男三人觀冕僧生錫南縣學生出爲從父鼎訓
後觀黻甲午舉人女四人適夏銘世嚴啓泰邵煦德劉

照青皆縣學生孫男五人孫女六人曾孫男一人先生以光緒四年葬石門村殿基山之麓諸子承遺志未爲墓石之文故新修縣志無先生傳竊謂先生之行誼可以敦薄俗而式來今非特一時之師表也先生雖不求知於人而後之慕先生者非託諸文字無以申其敬慕之意且懼盛德之傳聞有時而佚則後生小子將何所取法焉乃爲文以表於阡丙申春正月謹表

方公仰喬墓表

公諱喬字仰喬一名仁高姓方氏其先閩之莆田人宋

時有諱軫者以太廟齋郎上書請誅蔡京編管嶺南尋
戍永州赦還出知鄞縣貧不能歸因家焉子姓再徙居
鎮海之柏墅村方氏遂爲鎮海人自軫以來無顯名者
公之父亨吟服賈申江始以義行聞於鄉里縣志有傳
公其長子也公事親孝父素患痔老而益劇公手調藥
敷患處或中有積滯徐爲導達不避汙穢親歿述先人
勤苦事恆歔歔流涕生平不妄費一錢服食器具務從
儉樸居室偪仄裁足禦風雨而已至於營家廟立義莊
規畫久遠不爲苟簡親友以匱乏告必厚振恤之尤留

心於水利近村河道自駱駝橋至江北岸綿延三十餘里爲鄞慈鎮三縣通渠歲久淤淺夏秋稍旱兩岸數萬畝田禾悉患枯槁公請於宗守源瀚募工疏濬費白金巨萬由是旱不爲災其見義勇爲皆此類也性寬厚臧獲有過必婉言開諭遇事務持大體尤善知人列肆徧於外邑執業無慮百餘人量材任使各稱其職或有委用方專忽謝而去之旁觀莫測其故後其人受任他姓卒致僨事眾乃服公之先見嗚呼開國承家類非一手一足之烈惟公惻惻無華所信任者一以篤實謹慎爲